

Kerweredd von Winfried Leßmeister 1946

Am Gasthaus Kurz (Metzjerch)

Ich grüß euch all er Festtagsgäst
von Nord von Süd von Ost und West
die ihr eich han do ingefunn
se here was ich hann venumm
se here was mer in de Welt
von de Hütschehauser Kerb
de Mäd un de Buwe hellt
vun vorne rin will ich eich aber gleich was sahn
was vielleicht net jeder kann vetrahn
bei uns do wert nor pälzisch gered
un ebbes anneres gebts do net.
Schunn vel bin ich erumm gefahr
un hot uff mancher Kerb e Fraa.
Un wann ich han so mit de Alte geschwätzt
do horre se all was uffgesetzt
es Endergenis war defunn
daß se uff die Hütschehauser Kerb
sinn am liebste kumm .
Wann die lescht Generation es hat gewollt
daß mer unserer Kerb hat so viel Beifall gezollt
un wann ses immer han so gespitzt
daß aus de Kerweredd de Humor so gespritzt
so wolle mer die Tration bewahre un uff

de selbe Schiene fahre.

Wann sonst im Ort de Anfang wird gemacht,
do gebts gewöhnlich met em Borjemechteramt Krach.
Das wolle mer heit emol vermisse.

De erschte wo dran kummt iss de Wert daß ners wisse
Theodor hest er un is bekannt
mem dickchte Schmerbauch im ganze Land.

Er un sei Fraa sin zwee gute Leit
un außerdem a ziehmlich gescheit.

Doneilich is ihm ebbes bassert
das han ich do drin uffgefehrt.

Die Weibslait gehn als enaus uffs Feld,
weil aber de Chef draus nix schafft
do hansene an de Kochhawe gestellt.

Aber do gebts net lang Geferts met der Sach
do werre ewe grad e paar Krummbeere üwer gemacht.

Am Owe harre wolle net weire steh

Er hat Angst do vorre am Fenster kennt ihm was
entgeh.

Gleich ware met so me junge Ding in e Gespräch
vertieft,

uffemol saht das ich mächt nor wisse was bei eich so
riecht,

in die Küch is er gesaust wie so geölter Blitz
sei erschtes war in de Kochhawe gespitzt.

Die Brill die schiebt er sich uff die Stern
er fühlt sich grad mol ans Gehern.

Er denkt sich o Schreck o Kraus

wie siehn dann nor mei Krummbeer aus.
Er saht sich selbst, met denne kann ich nix me mache,
die muss ich schnell in de Sauhawe schaffe.
Aber do driwer sahn ich eich ganz korz,
die Krummbeere ware selbst de Sau so schwarz.
Dann wolle mer a net sei Mäd vegesse
die horre am Saal putze ganz großes Interesse
un wamerse dobei hat gesieh,
do muß mer nor denke wo wolle die noch hin.
Es ging do bloß noch 1-2-3
un schon war de Saal von Steibche frei,
was so gleich dann kenne mer sieh
wann mer not in de Saal enuff zieh,
do geb ich eich noch e guter Rot
bleibe met eiere Fieß uff Droht.
Dann han se a noch so klener Racker
der is bei de Mädcher schon ganz wacker.
Vel wolle mer iwer denne net schreiwe.

Doch ebbes schlechtes hat die Wertschaft in sich
die Weinfässer werre von Vollheit ranzig.
Die nächte wo mer prelle sinn no Adam Riese selle,
wo uns drowe bringe Vergnüge
dass mer uns vor Freed noch biege.
De e is im singe un spiele famos
aber auch als Schlagzeigspieler ganz groß.

Unser Dokter hat sich e Gehilfin angaschert

er hat se in sei Herzje in quatert
un wann er Freitags die Stroß passiert
stets e Blumestauß sei Ärmche ziert
met seim Mädche kann er vun mer
aus mache was er will,
doch heut muss er horche uff uns ganz still
un er soll sich jo net unnersteh
um elf Uhr fort se geh.

Um Mitternacht solls erscht beginne
dass mer unser Mädcher finne.

Un der do met em Schifferklavier
das is e feiner Kavalier
Uewer denne wes ich net vel se sahn
er wohnt bloß bei ennerer junge Fraa.
Doch men ich, mer braucht bloß in Bücher se gucke
un mer sieht was Musikmeschter han fer Mucke.

Die Mädcher wolle mer a net vegesse
denn die sinn fa die Allgemeinheit
von großem Interesse,
über 2 wes ich halt nix se sahn
ich siehns jo net wann se Musikzeich weg trahn,
doch grad 2 Päärcher fa 1 Kappel,
das scheint immer so e Höll
un damit eier Name wird recht bekannt
posaune es Lieblingslied ins Land.

(die Hände hoch)

Bevor jetzt werre die Junge rasert,
krien die Alte was unner die Nas geschmeert.
Hütschehouse hat nämlich e ganz komischer More
die Alte stecke inn die Lieb die Ohre,
in de lescht Zeit werre die Heirate all gemach
unn dass is doch werklich e bösie Sach,
ver heit aber sahn mer eich alte Weiber
met eiere verrättsche Kaffeemeiler
stehe doch net do unne un gaffe
gängener doch häm un dere am Fußborm schaffe.

Heit Owend komme bloß net in de Saal un spitze,
wie eier Mäd un Buwe in de Ecke sitze.
So lang wies hell is losse eich drowe blicke,
eier Alter der kann eich e bissje dricke,
un die Töchter die werre sich schon schicke.

Wanns dunkel wird sinn doch so nett
nemme de Alt gehn hem merm ins Bett.
Kimmere eich net um die Jugend,
denn sie hat er eigenie Tugend.

So er Alte eich zum Bleser

“ Schön ist die Jugend sie kommt nicht mehr “

Jetzt wolle mer die Junge picke
un hinner dere Tate blicke
fort brauchener awer net se geh,
er könnt jetzt erscht mol grade steh.
Es sinn do 2 Mädchen se nenne
er Ansicht is eigentlich net se verkenne,
sie wollte immer recht artig sinn
so se jo net kumme in die Kerweredd erinn,
mer han a lang dezu gebraucht
doch bald is ebbes uffgetaucht
es ene is so e schwarzer Deiwel
un wohnt do unne im e grüne Geiwel.
In Katzebach is enner wo sich will mem velowe
das Mädchen dut awer arich dowe,
un schließlich hat sich de Zufall getroff
dass die Katzebacher Los hat Ferkel geworf.
Werre war de Deiwel net faul
un rennt e niwer wie e Gaul,
er Leit ,ich muß doch e Wutzje han,
was fang ich sonst an Weihnachte an,
doch die Katzebacher han die Köpp geschittelt,
so schnell wird unser Sieb net gerüttelt.
Das Liebche han se hem geschickt
un folgendes Wort in sei Herzje gedrickt.
Wann de willcht e Wutzje han
Muschte erscht ans Atursche ran.

So isses dem Mädchen dort driwe gang

un das hats wohl gemach so bang.

Sei Patnerin wohnt a in dem Eck
backt aber meistens beim Bäcker sei Weck.
Es is e Mädsche ganz hübsch un fein
es geht em grad ins Herzje nein,
ebbes Böses is jo net übers se sahn,
doch scheint sichs manschmol
met de Bäckerbuwe net se vetran.

Vor noch net allzulanger Zeit
Is es Hänsje aus Amerika geschneit
2 dicke Arme harre gehat
un ausgesiehn wie e Owambo – Patt,
de Däg se knotsche ware nimmi gewehnt
er hat sich bloß no de Weibsleit geseht,
er glabt an dem Mädsche hät er s Richtige gefunn
un hätts gere geknoscht in de Backmuhl erumm,
e 6 Pünder Leebische wollt er ausem mache
dochs Goldkind hat em geb fa sei Sache
es saht zu ihm ganz keck un fein
schieb de erscht e mol die Schnerebetz in
de Backowe nei.

Die Buwe fange a se lache,
es Irmche wes net was es soll mache,
bis es hat schließlich erausgefunn
dass die Leit kee Schnerebetz sondern
Beereschnitz han gebrung

Un seit der Zeit do isses bekannt
dass das Mädchen im Eck
wird Schnerebetz genannt.

Er Leit das ware e paar harmlose Sache
fa die kenne die Musikante jetzt e mol enner macche.

Was jetzt noch kummt damit ihrs wisst
Zeigt Liebe wie sie wirklich ist.
Die Eminante komme dran
die sich werkllich han vertan,
vor kurzem is ne die Kerb ingefall
jetzt han se sich in Ordnung gehall
sie han gement mer dere nix me wisse
jetzt werrense sich aber in die Unnerröck pisse.
Do unne stehnse un gaffe
un sinn gepudert wie die Affe.
Hoffentlich werrese a ganz rot
wannse höre was bei uns is noch net tot,
we meiner kennen se sich vorher vedricke
es kommt jo noch e Wago voll fun Saarbrücke

Wie mer hie han unser Mäd
so sinn a unser Buwe vetret.
Do hammer so klener schwarzer hie
der schlackert ständich met de Knie,
er hat e paar Hosse ohne Latz
un hot von Spesbach mohl e Schatz,

in Mühlbach isses ihm bassert
do hotsene gewaltig angefehrt
do isser wie de Blitz e niwwer gerennt
es Klen war ins Heckeland durchgebrennt
e Zorn harre gehat wie noch nie
am liebschte härre wolle no Nanzwiller flieh
uff de Zug do isser jo schunn noch kumm
awer unserm Dr. sei Eck harre nächt metgenumm,
driwe kummt er an geflitzt
es Kind ganz ahnungslos im Eck drin sitzt
do ware froh un sehr sefrehre
er träumt schun fun die Maulschbach fehre
doch e annerer von hie der war uff zack
der kappt ihm gleich das Mädchen ab,
von dere Zeit an ware gehählt
er hats Marieche nimmi gequelt.

Do letscht is e Stück bassert
Do hat es e es anner schei-----gefehrt.
Kaum kummese in de Kuhstall erinn
do fallts e schunn in de Viehhawe ennin.
Das Kläd das holts jetzt schnell e raus
unn saht ei Märe wie siche dann nur aus,
jetzt muss a sowas noch bassere
wo ich dich selbst zum Klo will fehre
das anner saht no so me Schreck
jetzt gehn ich hem un leh mich ins Bett.
Uff de Abtritt kann jemand annerscht geh

bei mehr hängt alles an de Bää
so was dut mer nimmi bassere
ich losse mich im Lewe nimmi
durch eier Kuhstall fehre.
Drum die Moral von der Geschicht
Geh nie schei----- ohne Licht.

E annerer Fall is in Katzebach uff de Musik bassert
do hat sich e Märe vum Matzeberg
in e 3 Rad inquadert
de Fahrer hats erin gelockt
un hat met ihm am Steier gehockt.
Er hat ihm vezehlt manch schene Sache
das hat mer gemerkt an dem Märe seim Lache,
uff emol werds do drin ganz still
weil de Fahrer de Gashewel nemme will.
Am nächte Dag hat mers erscht richtig gesien
das Märe war moralich hin,
drum merke eich er Mäd fer alle Zeit
so geht's em wamer e Nacht ime 3 Rad leit.

Do unne sin 3 Schwestere hübsch un nett
die horre die Serwelaworscht im Nähkäschtche
unnerm Bett,
kee Mensch hattse solle siehn
die Kartefraa hat se solle kriehn.
Do is die Mamma ins Zimmer geschlitzt
un hat a unners Bett gespitzt

un wie se sich bückt die alt Fraa
do sieht se im Körbche die Servela.
Sie zieht es ganz sacht unnerm Bett eraus,
de Krach der blieb natürlich net aus,
das Klee das kriecht geherig sei Wichs
un ohne Worscht saht a die Kartefraa de Groß nix.

Es war vor Johre emol bassert
do hat e Wachmann e Märe vun hie pussiert.
Er hats net gescheit in un aus seh steie
um Nachts bei dem Märe im Bett se leihe,
es Fenster hat jo immer uff gestann
do war das kee Problem fa denne Mann.
Die Birn harre immer los gemacht
do war das so ziehmlich sicherie Sach.
Doch kann mer fa so Fall net immer garandere
wie sowas kennt zum Unglück fehre
Un werklich es is emol bassert,
do hat de Deiwel die Schwester in die Stub gefehrt.
Die Bettflasch hatse wolle hole
un kommt dem Kerl so an die Sohle,
sie saht zu ihrer Schwester ganz süß
hee du hascht awer große Füß.

Jedoch sie war a informert
sie hat das Päärche net länger gestehrt.
Un wie mer später hat venumm
is die Sach doch an die Öffentlichkeit kumm.

Dem Mann macht die Sach allmählich Verdruß.
Drum er Mäd nemme eich das als Warnung met,
solang die Mamma nix wes nemme kenner mit ins Bett.

Wie wars a doch so scheen ihr liewe Leit
zu der bekannt Schokoladezeit.
Wann mer Owends durchs Dorf is gang
so hat an jedem Hauseck e Päärche gestann,
doch die Zeit war net solang schon hin,
jetzt kenne die Mäd er Konzequenze ziehn.
Sogar e Holzvegaser hat mer in Anspruch genumm
un hat ens mit no Landstuhl gebrung.
So er Musikante jetzt speele de Mäd zum Glück

“Komm zurück“

Do is noch enner der wohnt net weit e wegg
der Kerl der is gallant un keck,
an Weibslait duts em garnet fehle
drum will ich eich jetzt emol e Spass vezehle.
Im Krankenhaus horre mol ens leihe
an dem hot er a angefang se freie
um die Sach e bissje romandich se mache
Kaaft er in Dengels Gladiole un so Sache
10 Mark fa die paar Blume,
das wahr jo net grad billig
awer de Werner bezahlt a net grad willig.
Hem iss er kumm so froh wie e Af

doch uff emol werd er ganz baff,
hinnerm Haus stellt er fest
er fangt an se gackse
er sieht die selbe Blume bei ihm im Garte wachse.
Ich siehne heit noch im Hof erum lafe,
se lewe dun ich kee Blume me kaafe.

Uff em Matzeberg do wohnt e Mann
der wollt e mol weise was er kann.
Er saht das wär jo noch zum Lache
wann ich kee Hasekaschte kennt mache,
uff sich selber ganz vertraut, hat er denne
Kaschte in de Küch gebaut.
Doch wie das Ding is fertig gewehn
do war die Stuweder so kleen.
Er mußne halt werre zamme schlan
un jedes Teilche einzeln in de Hof ennuner trahn.
Drum sahn mer dem heit zum nie vergesse,
beim nächte Kaschte baue, die Stuweder ausmesse.

Un noch e Fall fum Matzeberg
so war Vorsjohr enner iwerzwerch,
de Wein hat er in Masse genoss
do isser wie e Buldogg
in de Kremel geschoss.
Am Haus kumt er a die Deer wa zu
de Walter schnappt sich e Axt im nu
er haut das bissje Deer ennin

un is enuff zu seine Kinn,
met seiner Fraa warer nämlich bös
do isser halt zum Klenschte in die Schees.
Drum er Männer lossens eich sahn
Saufe net meh wie ner kenne vetrahn.

Er Musikante dun denne ener spiele,
derweil dun ich mei Kehl mol kiehle.

Dann is do noch e Päärche se nenne
er Benemme is garnet se verkenne,
es Mädchen scheint recht trei se sinn
weshalbs a is in die Danzschul erinn,
dort hanse gebilt e nettes Päärche
un a gespielt e scheenes Märche.

Owends wann de Dankkurs war aus
gingen se immer metnanner donunner ins Haus .
Es Lottche wollt bloß hole sei Rädche
doch de Erich wollt net fortlosse es Mädchen,
es Hänsje hat immer an Metzjerch gewart
un oft gegrummt was is das fer e Salat,
ich muß doch hem mei Schwester bringe,
was macht die bloß ver dumme Dinge.
Wo bleibt die schon werre so lang,
ach mehr werts vor Kummer bang
un wann se schließlich e ruff sin kumm
do hanse immer geschwätzt ganz dumm,
immer hanse müsse die Luftpump such

soll mer das werklich glawe er Buwe.
Ich men so Sache sin immer verdächtig
weshalb ich denne sahn ganz mächtig
nemme eich in Zukunft in acht
dass so Wörter kee falle bei Nacht.

Von de Straußbuwe kann ich eich net vehl sahn
weil sich die im Allgemeine gut vertrahn.
Hin un do haut emol enner iwer de Strang
aber das dauert gewöhnlich net lang.

Grad hammer do so schwarzer Klenner
an dem versieht sich jeder Renner.
Von Dietschwiller hoter mol e Mädchen pussiert,
doch an ehre Kerb hatsene ausgeschmert.
Schun Woche devor isser bei de Hütschehauser
Mäd erum
un saht, das hat schene Aue im Kopp,
wann das dich anguckt fallschte umm,
un das Mädchen, will ich eich sahn das is uff zack
do brauch ich keen Angst se han, das haut mer net ab.
Do war awer e annerer, er is a debei
der war schuld an de ganze Sauerei,
er hat das Mädchen so betört
un hats dann schließlich hemgefehrt.
Do is der Kerl im Saal erum gesaust
un war gewaltig uffgebraust,
sei leschter Mut harre hervor geholt

un saht dem Madche

“ Brigitte leb wohl “

Me kann un darf ich ber die Straubuwe
net bringe, sonst kenne se heit Owend
keen Tango schwinge.

No alte Vater Sitte mcht sich kenner unnersteh
Die 3 Erschte mit sedreh.

Kerweredd von Winfried Leßmeister 1947

Am Gasthaus Kurz (Metzjerch)

Ich grüß eich all wie ihr do stehn
ob dick ob dünn ob groß ob kleen
ob Schieber oder Wucherer
ob Gauner oder Fuggerer
ob Mädchehändler oder Ehebrecher
un wees Gott was noch fa Stecher
die Habtsach ihr sinn all scheen kumm
drum nemme ihr mers a net krumm
ihr griehn a jetzte scheen verzehlt
was sich übers Johr in Hütschehause abgespeelt.

Do hat e Mann fum Unnerdorf
sei Fraa spazere gefehrt.
Se erscht sin se de Bauere in die Dickworzele erinn
uff emol is Sie wie de Blitz in de Wald eninn,
doch er war gleich im Gallop hinnedran
was die do drin geschafft han
das kann ich eich net sahn
doch denne zwee denne will ichs verzehle
dun mer als Veheirate
net so viel im Maschberg speele

dun besser eier spanische Beleichtung mache
un wege meiner noch so paar Sache.
Doch gehen am helle Dach nimmi
met so Gedanke fort
un treibe dehem eier Familiesport.

Ehr Leit verschrecke net wanners here
was do 2 Brüder fa Sticker vollfere,
de e war Vorsjohr an de Kerb so blo
un doch hat ne sei Märe met ins
Heckeland gezoh.
Kaum kummese driwe an
do sahts Brigitte schun,alle genacht.
Ehr kenne eich jo vorstelle dasser dem hat schwer
geracht.
Sei Kleenes war im nu verschwunn,
do lerer sich vor lauter Zorn,
vor de Schlofstub in die Runn.
Sei Cuseng is vorbei der hat ne dann geweckt
do is der Schwarz fum Unnerdorf gewaltig
uffgeschreckt.
Der hat ne dann in die Arme genumm
un schließlich a noch hem gebrung.
Ins Haus kummt er ennin froo net wie ,
do leit
sei holdes Brüderche in de Schlofstub uff de Knie.
Die Bettdeck horre ganz veress

un sämtliche Blumestöck zum Fenster rausgeschmess.
Ihr Leit so Zustänn die kenne mer net losse,
weshalb ich denne sahn zu ere Bosse,
gehn mer nimmi soweit fort met de Mäd,
zum Schluss kriener doch de Schuh hinne nin
gedreht.

Do unne wohnt e Fraa,na ich will se net nenne
die wollt emol Wasser met Butter vermenge,
mer hat ihr weis gemacht zum Scherz,
von all zuviel Butter kriet mers ans Herz.
Die Fraa die losst sich a scheen vefehre
Geht hem un dut es Feier scheere.
E halb Pund Butter hat se velafe geloss
un e Schoppe Wasser dezu gegoss,
doch die Mischung scheint net se funktioniere
das Wasser un die Butter dun garnet harmoniere.
Sie steht devor un guckt in de Hawe
un saht das kann ich bald selbst net glawe.
Sie rührt un rührt un hört net uff,
jedoch die Butter steht immer owe druff.
Wie das Zeich not kalt worr is
do stehtse vorre dran wie e Lamm,
anstatt e halb Pund Butter warens nur noch
200 Gramm.
Deshalb ehr Weibslait lossens eich sahn
so Experimente kann mer heit nimmi vetrahn.

Do unne im Unnerdorf wohnt e Wirt
das is de modernschte Gänsehirt.
Der hat sei Federvieh ins Wähnche gesetzt
un is met enaus uffs Feld gewetzt,
scheinbar wollt er emol ermesse
was mer dehem inspare kann an Fresse.
Doch wie die Gäns uff die Stoppel sin kumm
do merkt er, dass die Sach is net gelung.
Die setze gleich zum Hemflug an
un unser Hirt steht hinne dran,
do drehre sich emol im Krees erum
un sämtliche Gäns die ware verschwunn.
Es Wähnche steht e lee noch do
do harres dann halt hem gezoh.
So isse dem Mann do unne gang
der wo das Gänsevieh hat mit Verstand.
Drum nemme mer fa so Arwet kee Wirt
sondern e geübter Gänsehirt.

Ihr Kerwegäst ehr wisse jo das Hochzeit mache
is e Plo ,
so manche is das aber sehr recht
do kummense uff e Fresse Fescht.
Dort werre se uff emol dick un Fett
un nemme als noch e Rucksack voll met.

So is vor korzem e Stichelche bassert,

do hat jo so e Fremder e Hütschehauser
Mädche in die Kerch gefehrt.

Es Fescht un die erscht Nacht das ware jo so Sache
Jetzt wollten se aber noch die Hochzeitsrees mache,
ehr wisse jo dass das zur Zeit is recht schwer
alle weil mit dem schlechte Bahnverkehr.

Doch deshalb brauch mer sich gleich net se
blamere un die heilig Rääs mem Fuhrwerk
se voll fehre.

Die Zweek die ware garnet anspruchsvoll
die sinn do durch die Rinn gefahr das war ganz toll.
Mer han grad do unne im Fenschter geläh,
do saht enner,ei guck e mol,
was kumme dann do fa zwee.

Es hats Dirndelche an un er die Krawatt
mer ware anfangs a ganz blatt.

Mitte in de Woch im Sonntagsstaat
un die Hoor frisch geschnett
do han ich zu de annere gesaht,
do stimmt doch ebbes net, un dann noch met em
Fuhrwerk un de Küh vorne dran,
ball hat mer kenne nix me sahn.

E Weil hammer noch gestann do am Haus
do kumme die zwee Hännesjer emol grad aus de
Backstub e raus.

Der Amerikaner saht met gerechter Ruh,
ich mach mei Hochzetsrääs emol met unserer Kuh.

Zuerscht do nenn ich eich jetzt de Wert
damit der sich net a noch schnerrt
Er hat sich jo schun ingebild
die Sach met dem Scherm wer net so wild,
nämlich vorsjohr gleich no de Kerb do isses bassert,
do is Metzjerch Theodor von Habstuhl hem spazert.
De Scherm hat er am Arme henke
un dut sei Schritt em Dorf zu lenke.
Uff em Landratsamt hats em net besonersch gang
die horre nämlich Krach mem angefang.
Do drüwer grübelter jetzt no
un war vor lauter Raasch ganz blo.
Doch wie er kumm iss vor de Ort
do merkter schun de Scherm is fort,de Griff
harre bloß noch in de Hand,doch owe es Dach
war über Land.So kummt er hem er als de Herr
un saht zu seiner Fraa, so han er Gescherr.

De Jung musst sich uffs Motorad setze
Un eniwer an die Schwarzbach wetze,
dort isser in de Wisse erum
bis ihm die Sach iss kumm zu dumm.
Deshalb Frau Wirtin loss dich belehre,
geb im Theodor kee Scherm mer met
er dut ne doch velehre.

So un jetzt kummt die Kappell
der zoppel ich jetzt emol es Fell.

De e defun is an de Weihnachte kumm
un hat sich aus em Kremel e Fraa genumm
De Wein harre von Ramschde her gezoh
doch in Spesbach an de Kasern do isser hingeflo.
Das gut Getränk is in de Schnee geschwumm
un er iss wie e Wilder drumm erumm.
Doch die Sach die konnte nix me nütze
er musst mem leere Schlere no Hütschehause flitze.

Un als Nächster kummt jetzt de Schlagzeigspeeler dran
er Leit gucke eich nor mol denne Casanova an.
Der hat sich am Fußballbälche ens geb,
do harre über de Clemens aus Spesbach geruf,
mach langsam ich fahre met.
Do harre sei Drommel met uffs Auto genumm
doch in Spesbach isser ercht zu sich kumm,
do fangt er a se fluche.
An Kohle Wissegarte harre gesses
un hat die Trommel um de Hals.
So langsam harre sich dann heem geschafft
un hatt als enner gespeelt.
Jedoch in dere schöne Nacht
Hat em sei Gertrudsche gefehlt.
Met dere dure als am Brünne pussiere
Un die Annere leie hinnedrahn un dun sich amüsiere

Do unne wohnt e schwarzes Mädchen
das hat e wunnerbares Sommerklädche

met dem wollts uff es Mühlbacher Sommerfest,
danze, anscheinend wollts emol geh uffs Ganze.

Es leht das Klädche in sei Stub uffs Bett
un ruft seiner Freindin zum Fenschter raus,
mach langsam ich geh met.

Überdem geht er Gees in die Stub erinn
un sieht uff em Bett das farbig Ding,
das hat ihr bestimmt ganz gut gefall,
sonst wer se net driwwer hergefall.

Unne de Saum un owe die Tress
die hat das Geesje ab gefress.

Jetzt wars erum met de ganz Freed
sie hat dann gleich es Kläd genäht,
dann isses dem Geesje nogesterzt
das hat sichs nämlich jetzt verscherzt.

Drumm er Mäd, sperre beim Umzieh die
Stuweder zu,

wann kee Gees es Kläd verfresst
guck bestimmt e Böckelche zu.

Uff em Matzeberg wohnt e Fraa
die iss wirklich se bedauere
die hat im Haus Nähmädcher
das sinn richtig Krumbeer schlaue.

Das e iss e mol in de Keller gang,
wollt hohle e Emer voll Brand,
doch uff emol isses gewaltig veschrock
do grawelt e Dier an de Wand.

Im nu do hats de Stecke geschnappt
un schlad erbärmlich druff,
dann nemmts de Emer in die Hand
un geht dann werre nuff.
Net lang deno geht die Hausfraa in de Keller
meme große Korb voll Gras
do sieht se neue an de Wand ihr tot geschlahner Has.
Sieh wes net wie das zugang iss
un war jo a ganz platt,
doch es Nähmädche kennt ihr jo sahn
es hat ne totgeschla fa e Ratt.

In Landstuhl uff em Bahnhof do is Stück bassert
do hat sich e Fraa fum Matzeberg
mol ganz gewaltig blammert.
Die sanitäre Anlage sinn jo heit so schlecht
beschaff,drumm iss das Austrere für die Reisende
e bitter bösi Sach.

Jedoch der Fraa macht das kee Verdruß
sie setzt sich ganz einfach gesaht

“ Ich muss “

Iwer dem,do werds a schun gleich Zeit
an de Sperr do stehe schon ziemlich Leit.
Do hat sich die Fraa nimmi bedenkt
un iss schnell an de Zug gerennt,
doch wie se hat wolle ihr Fahrkart weise
do steht se do un dut erbleiche,
sie dreht sich erum un iss ganz platt

weil se de Abtrittsdeckel hat.
Schnell isse zurück gesprung un hat de Deckel
an sei Platz gebrung.
Die Kart war zum Glück a noch net fort,
sie hat noch gelä am bestimmte Ort.
Die hat se dann unner de Arme geklemmt
un iss dann im 120 ziger Tempo losgerennt.
Drum all er Weibslait treiwens net so doll
Losse de Abtrittsdeckel leie
sunsch kriener noch e Protegoll.

Uff de Neimiehl wohnt e dicki Fraa
fun dere will ich eich e mol e Stichelche sahn.
Sie kocht ganz gut,dass muss ich Ihr losse
doch manche mol macht se große Bosse.
Sie denkt sich aus mit alle Raffinesse
was geb ich dann heit meine Buwe se esse
Ganz kurz entschloss geht se in de Keller
un dut e paar sauere Bohne uff de Deller,
fa die se wäsche hat se wenig Zeit,
dodevor aber doppelt gut zubereit.
Die Bohne hat se dann gekocht
un uff de Disch gestellt,
uff emol hörtse wie de Eeedgar schellt
er ruft ganz laut un wird ganz blass
un saht ei Mamme was iss dann dass.
Do fahrt sich die Fraa emol ans Bless
un saht,fro net so dumm halls Maul un fress.

Do stecht er halt erinn mit aller Kraft.
dass spritzt de ganz Bohnesaft.
In de Gawel horre, o Schreck o Kraus,
e große ingemachtie Maus.
Do wars vorbei mem Mettagesse,
das Zeich das durft es Wutzje fresse.
Die Buwe sinn uff un sinn all los
un han erer Motter uffs Esse geblos.
Deshalb er Weibslait sahn ich eich ganz frech,
koche kee Bohne ohne gewesch.

Do iss jetzt über die Weibslait se berichte,
es sinn so ganz verzwicke Geschichte,
die e die hat sich net geniert
un nachts e junger Kerl in er Stub gefehrt
de Hausbesitzer hat sichs net gefalle geloss
do iss der Kerl zu de Deer e raus geschoss,
in de Näh an de Mischtkaut isser geland
dort harre sich hoch geschafft neue an de Wand,
hem isser gang so ware geschlah
aber ich glab er geht schunn werre zu dere Fraa.

Dere annere isses gelung
die hat gemacht e guter Sprung,
de Fallschirm hat sich net gelöst
do isse halt no de Landung in ihr Bett gerest.
Drum all er Weibslait lossens eich sahn

es Fliehe kann net jeder Mensch vertrahn.

Damits jetzt bei denne gebt keen Streit

Wird a es 3.noch angezeiht.

Mer hats awer met allen ertappt

die Freindin hat mer a geschnappt.

So scheine dass zwee harmlose Kinner, aber Abends

hanses fauscht dick dehinner

Vor 3 Woche nachts zwische 11-12

simmer durchs Dorf wie die Wölf.

Un wie mer ins Unnerdorf sinn kumm

do höre mer am e Haus Gebrumm.

Er Leit was hammer do endeckt

Anfangs ware mer ganz erschreckt,

stehn do die Mädcher hinne an de Wand

un vornedran e Herr uns all bekannt

geschunkelt un gekikert hanse

wie wan so Gees wollt Polka danze,

uff emol warese ganz entsetzt

un sinn wie de Blitz ausenanner gewetzt

e Kerl der iss gelaaf wie e Dummer

dass er dapper kummt zum Ott ennuner

die Freindin hat an de Wand die Deckung gesucht,

es 3. Hat es Deerche als Schutz verbucht

un schließlich saatse noch ganz besterzt

jetzt hammers awer ve schertzt

do hall ich jetzt nix Gures defun

sunch härre sich net so dämlich benum

un ich sahn eich außerdem noch all
das war net de einzig Fall

Do unne wohnt e Mann dem iss e Stichelche gelung,der
hat e mol sei Has zum Ritt gebrung.

Das Dier iss nämlich im Kaschte hin un her
als ob es werklich hitzig wär.

Der Has hat nämlich gebess un gekrätzt
do harre ne zum Ritt in de Kaschte gesetzt.

Kaum ware drin do herrener kenne was siehn
wie die zwee Hase annoner sinn
un kenner wollt unne hin.

Der Mann der steht als vorre drahn
un sieht sich die Sach e Zeitlang an.

Doch uff emol kummt ihm die Sach zu dumm
do harre halt werre sei Has eraus genumm,
er hat ne sich dann nochemol genau betracht
un e kleenie Feststellung gemach,
doch bevor ichs eich sahn,han ich e kleenie Bitt
sahn nor nix weire, es war e Ritt.

Ihr Leit mer kenne froh sinn
dass mer e Feuerwehr hann
wann die nämlich net wär
hätt manchi Fraa kee Mann.

Vor 4 Woche iss nämlich e Stichelche geglückt
do hat e Fraa fum Matzeberg ihr Mann
die Geese hiere geschickt.

Zur Unnerhaltung harre sich e Buch mitgenumm.
Er geht dann in die Wisse un leht sich e bissje um,
doch wie die Geese sich horre gespickt
do hatse dann die Milich gedrickt,
kee e hats not me ausgehall
do sinn se im Caracho hem in de Stall.
Do saht die Fraa “ sinn die Geese schunn do “
dann kummt mei Mann bestimmt gleich no.
Sie wart un wart e ganzi Stunn,
jedoch ihr Mann der iss net kumm,
do werds ihr uff emol angst unn bang
met de halwe Feierwehr sinn se in die Wisse gang.
Dort hanse gesucht e scheenie Zeit,
uff emol saht ens ,
ich glab dass er do im Grawe leit,
un werklich er hat geschlof un geträumt ganz net
un hat gemehnt er wär de hem im Bett.
Dann dut ne sei Fraa gleich hemzus fehre,
doch er darf se Lewe kee Geese me hiere.

So jetzt will ich emol an die Weibsleit im allgemeine
rücke,
na ich will se zwar net so arisch drücke,
doch dun mer über die Kerb
net so hinner de junge her geh,
dass iss nämlich fa alte Weibsleit net schä.
No de Kerb hests werre wies alle Johr geht
der do hat met de Lies gedantz

un der anner met de Gret,
unns Katsche hat sich hemfahre geloss,
ach Gott was hatt dann das gedenkt
un de Kurt uns Bienche han nachts um 12
ihr Weg zu Ziegles Baamstick gelenkt.
Deshalb er Weibslait losse doch das Geplappers
sinn, ihr wisse doch selbst ganz genau,
es bringt eich doch nix in.
Se erscht helfe se ere Töchter e Danzborsch suche
un wanner dann metre spazeere geht
dann dunse werre fluche.

Do owe wohnt e Mann der wollt emol prowere
ob er ohne Fraa sei Haushalt kann fehre.
Er losst sich e bissje Wasser ins Häbsche laafe
un springt dapper e ½ Pund Gries sich kaafe
denne losst er ins Wasser met aller Ruh
un dut e bissje Salz dezu.
Er steht vorre dran un rührt als erum
jedoch der Gries iss nimmi kumm.
Uff emol wird er wild un fangt an se blärre
Rehrt als drin erum un ruft das muss doch was werre.
Doch uff emol siehres, er kanns kaum glawe,
do war so dicker Griesballe in seim Hawe.
Denne harre dann de Hinkel geb
die han sich netemol drum gestrett.

Deshalb er Mannslait losse vom Koche eier Finger,

es gebt jo doch die un möglichste Dinger

So , un ich here jetzt uff

Un mer gehen in de Saal enuff.

Kerweredd von Winfried Leßmeister 1948

Am Gasthaus Kurz (Metzjerch)

Ich grüß Eich all ganz zuckersüß

ob er vun Bann sinn oder Gries,

ob ner aus em Heckeland kumme oder driwe aus em
Bruch,

ganz gleich ob ner gelaf kumm sinn oder gefahr met em
Zug,

das e steht fest Dassjohr werd unser Kerb enorm,

grad vier Woche no de Währungsreform,

mer brauch nimmi se fuggere un a nimmi se schiewe,
mer kann jetzt kaafe ganz no seim Beliewe,
deshalb hammer a gesorgt fer Wein und sonstige
Getränke

sodass sich jeder die Gorkl kann anstännich schwenke,
doch ens will ich eich von vorne rinn sah,
saufe net me wie ner kenne vertrah,
e bissje besoff iss jo ganz niedlich,
doch all zuviel iss ungemietlich,
drum merkes eich jetzt gleich im Voraus,
wer Krach macht flieht de Saal enaus.

So ehr Leit jetzt krien er vezehlt
wie sich die Hütschehauser Mannsleit han uffgespelt .

Do owe uff em Matzeberg do wohnt e Bauer,
er Leit dass iss e Überschlauer.
Der wollt sei Kuh in de Keller stoppe
un uff em schwarze Markt vekloppe,
dass hest es iss em a gelung er das Tier in de Keller
gebrung ,
dann harre sich in de Zug gesetzt
un iss no Lautere zum Nushag gewetzt.
Dort verzehlt er sei Tate naturgetrei
direkt em von de Kriminalpolizei,
der Mann hat jedoch gewisst was sich gehert
un hat die Mühlbacher Schandarmrie antelefoniert,
die han sich dann no Hütschehause geschafft

un hann dem Mann sei Kuh vehafft.
Der Bauer musst e Buß entrichte un uff sei Hännelche
verzichte,
drum lieber Mann der sahn ichs heit,
met denne Sache kummchte net weit.
Wann du dich uffs Schiebe willscht verlehe
do derfschde net no Lautere zu de Kripo gehe.

Do unne wohnt e Mann er iss uns all bekannt,
im Sommer laft er de Bauere alsemol übers Land,
im Herbst tut er die Buwe verhaue
wann se de Leit die Äppel klaue.
Gere iss er als met in de Wald es Steerholz mache
unn basst uff dass die ungezechelte Bäm net krache.
Vorsjohr horre uns no Bechhofs gefehrt
do is e scheni Geschicht passert.
Mem Strack seim Auto simmer enuff gekrawelt
gleich truff de ganze Wald Schun zawelt,
kaum horre mer angefang se schaffe
do tut uns de Schütz uff was uffmerksam mache,
er saht uns, gewe blos acht er Buwe,
do iss alles zu met Wildsaugruwe.
So hammer geschafft , e Steer Holz gemach im nu ,
so langsam gehts im Feierowend zu.
De Schütz tut von em zum Annere flitze
un guckt obs Holz tut richtig sitze.
Unser Steer harre se erscht beseh
un wollt dann zu de Annere geh.

Ich dreh mich erum und guckem no
uff emol war de Schütz nimmi do,
es war em grad alls krechter e Schub
un schon sitzt er in de Wildsaugrub.
Er Leit dass hätt mer misse fotografere
wie der tut in de Grub spazere.
De Blechschmitt hat ne dann eraus gehol ,
sonst hätt der noch so Tier gestohl.

Vorsjohr über die Kerb do iss e Stick bassert
do hat sich e Mann net weit vun do ganz schä blamert.
Do owe horre de Wein in Masse genoss
un iss wie e Wilder die Trepp erunner geschoss,
do neue an die Mauer iss er hin ganz unschenert,
hat net gemerkt dass do e Kerl sei Mädche pussiert ,
er stellt sich dort hin un macht sei Sach
uff emol macht das Weibsbild Krach,
vun hinne vun vorre un von neue nass,
das arme Mädche war ganz blass,
zum Danze hats jetzt nimmi kenne geh
s hat ausgeseh als wärs im Rä gewäh.
Deshalb er Mäd ich sahns eich dass ners wisse
bleiwe do iwwer die Kerb eweg,
do gehn die Männer hin zum pisse.

Jetzt vum e Neimiller Bauer e Geschicht
ich kanns eich sahn dene hanse schee verwischt.
Vorsjohr harre em me Grenzgänger

e paar Zentner Krummbere vekimmelt,
doch der hat ne ganz schä abgewimmelt,
100 France harrem ¹do devor angetreht
un der Bauer hat sich schun uff Tuwak gefreet,
e me Bergmann harre das Geld dann geb un saht
bring mer e Peif un e paar Päckelcher Tuwak met,
doch wie der Mann die paar Franke sieht,
do hat bei dem was uffgeblüht,
fa dass Geld kann ich der höchstens
1 Peif un 1 Päckelche Tuwak bringe
me kann ich mem beschte Wille net erschwinge.
Do iss dann de Bauer dehinner kumm,
dass ne do hat enner uffs Ärmche genumm.
Aber do drahn war jetzt nix me se mache
der Grenzgänger hat jetzt gut lache.

Net weit vun do do wohnt e Mann
der feht sich uff do iss alles dran
am Fußballbäälche isses bassert
do harre e junges Mädsche spazere gefehrt,
er hats um die Tallie genumm un vezehlt
wie sich de Mond um die Erd erum quält,
so sinn se gang bis e nuffer uff die Heed,
dann han se sich werre em Dorf zgedreht
un wie der Unerichtsgang war beend
do iss er werre in de Saal gerennt
e schenes Viasko hammer do erlebt

do hat em jemand e geklebt
un wie dass **iss bei allzuviel Huld**,
do kriecht e dritter immer die Schuld
un deshalb will der Mann der feche
sich am me schene Tag an dem annere räche,
doch ich sahn dem Mann das soll er sich merke ,
se erschit soll er sich de Navel stärke .
Un er Musikante spele jetzt dem Mann

“ Ach wie ists möglich dann “

Mer schtaunt an was sich manche doch getraue
so wollte zwä do aus em Dorf e Paddelboot baue,
glei sinn se dra mit volller Energie
na dodefor sinns jo aa Genie
4 Meter lang hanse das Boot gemacht
er Leit das war e wahrie Pracht.
Hinne wars rund und vorre spitz
und in de Mitte fa enner Mann e Sitz.
Uff emol kummt Enner der hattse dann belehrt
dass Boot das iss jo ganz verkehrt,
die Spitz do vorre muss noch was eraus
dass der Kahn dann besser ins Wasser saußt.
Die 2 han dem Mann dan Glawe geschenkt
un han noch e Stück vorre dran gehängt.
Wie der Kahn dann endlich fertig war
hansene mem Wähnche an die Schwarzbach gefahr.
Sie wolltne sacht ins Wasser setze

um schneidig uff und ab se wetze,
doch kaum ware im Boot gewäh die zwee
do hann se a schun in de Bach geläh,
sie ware nass biss iwer die Knie
un mussten ihr Kahn aus em Wasser zieh.
So un eich sahn ich jetzt ihr zwee Schlaue
here uff met eire Schiffe se baue.
Wie schnell hat sich so was erum gesproocht
un schun werrener we baue von Kriegsmaterial
gestroft.

E anneri Geschicht iss im Unnerdorf bassert
do hat e Mann sei Fraa es Melke gelehrt,
se erscht harres theoretisch mit ihr durchgenumm
doch do sinn se zu kemm Ergebnis kumm,
er überleht sich wie ers kennt erreiche
seiner Fraa die Sach praktisch se zeiche
uff emol kriere e großartige Idee,
er saht sich still das Ding muss geh.
Beim Raserer hat er sich e Schnoller kaf
dann isser werre hemgelaf,
denne harre dann an de Wasserkrahne montert
un die Sach dann praktisch vorgefehrt,
so sahre zu seiner Fraa , guck her un spitz,
dass do iss jetzt die Zitz.
Do ziechte jetzt langsam von Owe no Unne
un ich sahn der dann es muss was kumme.
So hat die Fraa dene Schnoller massert

un hat dann plötzlich uffgehert,
sie saht dann schließlich zu ihm Mann,
ich glab dass ich jetzt melke kann.
Drum sahn ichs all dene die wo es Melkexsame
wolle besteh,
zuerscht mem Schnoller an de Wasserkrähne geh.

Do unne wohnt e Fraa, ziemlich groß unn dick
die hat er Tochter ins Dorf geschickt .
Beim Katsche hatse Rotkraut kaf,
dann isse werre hemgelaf.
Die Dasch hat se dann uff de Disch gestellt
un iss met ehrer Nochberch enaus uffs Feld.
Die Fraa hat dann das Kraut geputzt
un gebt die Blärre erer Wutz,
die hat sich gar net lang genert
un hat alles rutz un putz uffgezehrt,
sogar die Lebensmittelkarte hatse mitverschlung
die wo die Fraa aus versehe mit in de Stall gebrung.
Wie die Tochter hem komm iss vom Feld,
do nemmt se gleich die Dasch uns Geld,
die Marke hatse dann gesucht un ganz gewaltig dezu
geflucht.
Sie konnt sich üwerlee un sich besinne,
die Marke ware net se finne,
doch jetzt kann ichs dem Märe sahn
ich hanse nämlich net vergess,
die Karte hat die Wutz gefress.

Kerzlich hat sich was zugetra
ich war wie vumm Schlach geschla.
Do siehn ich doch e Mädsche zum Eckbäcker geh
um Brot se kafe,ich konnt net wieder steh,
ich han nem no misse lafe
un wie ich der no, in die Backstub kumm
do ware die Buwe schun drumerum.
Sie han dem Mädsche sei Brüscht bewunert
un han em versichert so gäbs in Deutschland noch kee
100.
Über dem kommt de alte Chef dezu
un saht zu dem Mädsche in aller Ruh,
du haschht dich heit werre raus staffert
ich will e mol sieh wozu das noch fehrt.
Na saht das Mädsche un sie met ihm dicke Bauch,
ja saht de Bäcker das iss bei uns so Brauch.
So han se sich gestrett e ganzi Zeit,
ob sie die dickcht Bruscht oder er de dickcht Leib.
Um die Streitfrage se kläre
holt enner vun de Hanns de Meter
un messt emol das Märe,
dann kummt de Bäcker met de Messerei dran,
nächt herre es gleiche Maß gehat, ich han do gestann,
ich war ganz blatt.Das Mädsche steht do un freet sich
wie e Kenig ,de Bäcker hat 7cm zu wenig
So ehr Musikante jetzt spele unsere Mäd dass sichs
lohnt

„Komm wir baun uns ein Schloss auf den Mond“

Im Unnerdorf iss was basseert

vielleicht hann ehrs aa schunn geheert,
e Schdiggelche, es iss bestimmt was draan,
drumm däät ichs eich aa heit net saan.

Es gebt Leit die esse de Kuche gere
un so gehts aa dem schwarze Märe,
deshalb isse drahn ungenert
un hat fa e Kuche angerehrt.

Uff de Owe hats ne dannn gestellt fa se geh,
uff emol sieht se draus er Freindin steh
un wie das iss bei manche Leit, fa se base han se immer
Zeit,

die zwee han sich so manches verzehlt
der Zeit hat drinn de Hund am Kuchedeeg gespelt.

Als die Baserei dann glücklich beend
do isse schnell werre eninn gerennt.

Er Leit do herrener kenne seh,
de Hund mitte in de Deegschissel steh.

So wie vorsjohr die Gees die Tress,
so hat dasjohr de Hund de Kuchedeeg gefress,
do wird das Mädchen wild un schnappt sich de Stecke
un will dene Hund mol richtig specke,

sie hat ne verschla met voller Kraft un Schwung
do iss er noch in die Appelschmer gesprung,
das Mädchen losst sich durch den Fall net verdriese,
holt Mehl un dut e bissje Wasser dezu gieße ,

met dem hatse dann frisch angerehrt
un de Recht Appelbrei driwergeschmert.
Drumm sahn ichs dem Mädsche zum nie vergesse,
wann de nochmol Kuche backscht
do baschte besser uff,
do dut der a de Hund de Deeg net fresse.

Im Unnerdorf hat sich was zugetra
was sollschde dodezu noch saa.
Ich will eich jetzt net länger queele
unn das eich glei briedwarm vehzeele.
Also dort wohnt e jung veheirat Paar,
die sich aa gere hann dass iss doch klar.
2 Johr veheirat unn horre noch kee Kinn ,
na das iss jo a weire net schlimm,
awer de Schwermutter hats so lang gedauert
die hat als uff ebbes Klennes gelauert.
Sie konnt sich iwerhapt net denke,
wo das bei dene zwee kennt hänge,
un plötzlich kummtse zu dem Entschluss,
dass de Dochtermann me Kraft han muss.
So iss die Fraa in e Bauerehaus
un leert dann dort er Herz mol aus.
Sie hat ne verzehlt vun ere Sorje
un hat gefrot fa e Liter Gesemilch jede Morje.
De Dochtermann dann brav un willig
sauft jede Morje die Gesemilich.
De Erfolg blieb dann a net aus

nom e Johr war ebbes klennes im Haus.
Deshalb er Weibslait wann er gäre Kinner härre un
wisse net wie
dann gewe eiere Männer Milich vum Geesevieh.

So unn jetzt kummt unser Wert an die Reih
net dass er sich schnerrt,. er wär net de bei.
Schunn die letzte 8 Woche dure sich brüchte
das Johr müssener uff mei Person verzichte,
mer han a werklich müsse suche
doch jetzt wird unser Thedor fluche.
Vorsjohr wars met de Kaferei schlecht bestellt
un das war net gut bei dere Kält,
also e Bettflasch wollt unser Thedor han,
weil sei besseri Hälft nimmi so wärme kann
un er hat doch dauernd kalte Bä,
von dem veele kiehlhaus stäh.
So mussten sei Töchter in de Weltgeschicht erum lafe
um met alle Mittel e Bettflasch se kafe.
Doch alle Anstrenge wollte nix nitze
de Thedor bringt sei Fies net zum schwitze.
So harre sich üwerleht als hin un her
un iss am e schene Tag enunner zum Schröer,
dem harre dann sei Leid vezehlt
un uff e Bettflasch angespelt,
de Schröer der wuhlt im Haufe erum
jedoch e Bettflasch harre kee funn.
Er hat unserm Wert e paar Feldflasche geb

der hat sich vor Freed die Hänne gereb.
Die harre dann in de Sack gestoppt un hem getrah
un saht dann gleich zu seiner Fraa,
heit Owend werre 6 Feldflasche ins Bett geleht
un wann alles unner Wasser steht.
Do hat mer künftig kenne seh die Madam,
met eme Korb voll Feldflasche in die Schlofstub enuffer
geh.

Doch ich sahn unserm Wert,
dass met dene Feldflasche iss nimmi Moore,
heit nemmt mer sich e Bettflasch met Ohre.

Net weit vunn do ,do wohnt e Määre,
mer wääs das danzt so fursch bar gääre.
Das heest ich wills eich besser sah ,
siss eigentlich schon e verheierati Fraa.
Dere iss do lecht was zugestoss, er Leit das war e
bitteres Los,
mer sollt jo menne es wär net wor
sie hat er goldener Armref velor ,
un sie konnt sich a net besinne wo das Schmuckstück
wär se finne,
eer ganzes Haus hatse durchwühlt
jedoch vom Armreef nix gefühlt ,
er Mann un de Cousen sinn met fluche,
bis e nuffer ans Eisloch de Armreef suche.
Sie iss dehem erum u dut simmelere
do musstse a uff de Clo spazere.

Kaum hottse die Deer hinner sich zugeknallt
schun was uff de Fußborm fällt,
awer mehr sollts net glawe es kennt net gäh,
die hat de Armreef an de Bää.
Drum sahn ichs heit de ganze Eminenz,
losse eier Armreef vun de Bää,
dort siehtne jo kenns.

Vunn de Straußbuwe getrau isch eich nix se sah,
ich hann Angschd die dääre mich noher veschlah.
So un jetzt will ich mei Red beschließe
un de Strauß met Wein begieße.
Eer Musikante mache enner druff
un mer maschere in de Saal enuff

Die 3 erschte halle mer uns aus
wer rinn danzt flieht de Saal enaus